

Noticia  
Transparente  
di Gobierno

# ISLA ONLINE

Diamars 23 Juli 2024

Email: [IslaOnline@gobierno.aw](mailto:IslaOnline@gobierno.aw) Tel: 528-4952



**STABILIDAD  
Y  
PROSPERIDAD**  
2 0 2 4

**Gabinete Wever-Croes**





## PROME MINISTER A REUNI CU DOW PA TRATA VARIOS PUNTO DI IMPORTANCIA

**Pa Gobierno di Aruba e tema di sushedad riba e isla ta un prioridad grandi**



Recientemente Prome Minister Evelyn Wever-Croes a reuni cu DOW pa trata puntonan di gran importancia. Un punto ta pa busca solucion pa mantene Aruba limpi y otro punto importante ta e ehecucion di proyectonan pendiente awor cu tin fondo disponibel.

### Sushedad rond Aruba

Pa Gobierno di Aruba e tema di sushedad riba e isla ta un prioridad grandi. Durante e reciente reunion, DOW a splica cu e situacion di sushedad riba nos isla a cambia hopi desde cu a cera e dump na Parkietenbos.

Prome Minister ta menciona cu ta di lamenta cu actualmente hopi mas hende ta tira sushi riba caya. Pa loke ta trata e seccion entre Sero Teishi y Aeropuerto di e Green Corridor, esaki ta wordo haci limpi tur dia, pero ya pa atardi por mira atrobe cu tin sushi tira. Tambe e situacion banda di e beachnan di Aruba ta uno alarmante. Akinan tin barinan di sushi chikito destina pa tira entre otro cups, napkin, etc. Pero tin hende ta bay pasa henter dia of haci un fiesta na lama y despues di esaki ta laga saconan grandi di sushi atras na e barinan chikito cu no por abarca esaki. Prome Minister ta pidi e ciudadanonan di Aruba cu ta bay lama pa pasa dia of haci un fiesta, pa hiba bek e sushi bo cas y desecha esaki apropiadamente.

### Ampliacion Personal DOW pa tene Aruba limpi

Prome Minister ta indica cu pa e motibonan aki DOW mester bay amplia su personal y ekipo pa por tene Aruba limpi. Aki



ta papia di gastonan adicional cu ta surpasa 1 miyon di florin. E mandatario tambe ta menciona cu ya a papia cu colega Minister Ursell Arends di Ministerio di Naturalesa, riba e tema pa pone mas atencion na conscientisacion como cu e limpieza di Aruba no ta responsabilidad di Ministerio di Infraestructura sino di Ministerio di Naturalesa. Lo mester traha mas riba e conscientisacion di e comunidad y bin cu boet pa esnan cu ta viola leynan y ta tira sushi riba caya.

### Ehecucion proyectonan pendiente

E otro tema trata durante e reunion cu DOW tawata esun di ehecucion di proyectonan. Tin varios proyecto cu ta pendiente desde fin di 2023. Awor e situacion financiero di Aruba a estabilisa y tin mas espacio den e presupuestonan pa inverti den esakinan. Entre otro scolnan, careteranan, y varios otro tipo di proyecto. Pa esaki DOW tin un reto awor ya e sector priva, referiendo na contratistanan, no por cu tur e cantidad di e trabou cu tin aworaki. Mescos pa careteranan, no tin suficiente companianan cu ta atende cu asphalt pa por ehecuta e cantidad di proyecto. Awor cu Gobierno tin placa, no tin suficiente contratista of compania cu ta atende cu asphalt pa ehecuta nan.

“P’esey e reunion aki, pa busca un solucion pa ehecuta proyectonan importante, y solucion con pa nos drecha nos careteranan awor cu tin fondo disponibel pa esey. Y pa busca solucion con pa traha hunto pa Aruba bira y keda limpi. Tawata un bon reunion, y mi ta sigur cu nos lo yega na e solucion pa tur e puntonan aki”, Prome Minister a expresa. ■





## MINISTER MADURO A YAMA E SELECCION DI LITTLE LEAGUE ARUBA Y CAMPEON DI CARIBE BONBINI NA AIRPORT

Diadomingo atardi cu masha placer Minister Maduro, den nomber di Minister President y Minister Endy Croes, a bay yama bonbini na e Seleccion di Aruba cu a titula Campeon di Little League di e Serie del Caribe, na nan yegada di Corsou.

E mandatario a topa cu e Seleccion di Aruba ora nan a baha di avion pa asina felicita nan y guia nan pa e bunita recepcion cu a sigui pa nan den e hal di airport. Minister Maduro a hiba palabra pa gradici cada un di nan pa nan esfuerzo haci y perseverancia demostra pa bira e Campeonnan di Little League di Caribe. E mandatario a gradici e coachnan, famia y tambe RBC cu a sponsor y deposita nan confiansa den e hoben atletanan.

Pa e ocasion importante aki, Minister Maduro hunto cu sr. Rafini di RBC a bisti ful e ekipo cu un bunita medaya ofreci pa Minister di Deporte sr. Endy Croes. Despues di a saca potret oficial, e ekipo a topa cu famia y amigo cu a yega airport pa yama nan bonbini bou di e tononan di brassband. Cu escort di Polis, e Campeonnan di Little League di Caribe a bay haci un recorido pa despues disfruta di un dushi treat pa celebra nan triunfo.

Ta importante pa menciona cu e triunfo aki ta hiba e Seleccion di Little League Aruba proximamente pa representa Caribe den e Little League World Series cu ta tuma na Williamsport na Merca. Minister Maduro ta felicita e Seleccion di Aruba hunto cu nan Coachnan, famia, sponsor y tur persona y instancia cu a yuda pa nan por tabata exitoso. Masha pabien y danki pa saca cara di Aruba. Minister Maduro ta desea e Seleccion hopi exito na Williamsport. ■■■











# MINISTER ENDY CROES A DUNA ALGUN AVANCE DI E PROYECTO DI RENOBACION DI STADION GPT NA DAKOTA

**Aruba tin un hoy a di stadion**



Recientemente, Minister Endy Croes a duna informacion actualisa di e ultimo desaroyonan cu ta tumando luga na Stadion GPT na Dakota. Manera ta conoci, e stadion a pasa den un fase di renobacion den su totalidad. E turf ta cla y certifica pa FIFA Y CONCACAF. Den luna di juni ultimo, FIFA World Cup Qualifiers a tuma luga den Stadion GPT na Dakota. E luznan ta cumpli cu standard di FIFA y CONCACAF, esta 1200 lux. E renobacion di e tribuna, VIP Room y instalacion di coriente ta kedando cla cuminsamento di luna di augustus binidero.

Na e momento aki, lo inicia cu e ultimo fase di e construccion, cual ta e atletiekbaan. Pa loke ta trata e atletiekbaan e "toplaag" ta di e marca Italiano Mondo, cual ta e miho marca na mundo. E marca Mondo tambe ta wordo uza den Weganan Olimpico. E container cu e materialnan a yega Aruba. Minister Endy Croes a remarca cu un trabou grandi cu ainda mester haci ta e "onderlaag" cu mester wordo ranca y basha ful di nobo. A order e "drainage system", cual ta uno hopi special y esaki lo ta na



Aruba dentro di 2 luna. Pues nos ta premira cu pa e proximo 3 pa 4 luna e trabou di construccion ta completamente finalisa.

E inauguracion oficial ta tuma luga e aña aki, unda cu Pueblo di Aruba ta keda cordialmente invita pa presencia diferente actividad deportivo tanto di futbol como atletismo. Pabien na e deporte rey di futbol y pabien na e disciplina di atletismo cu e proyecto nobo aki. ■



# 2024

## AÑA DI STABILIDAD Y PROSPERIDAD



### Gabinete Wever-Croes

Arte di Muraya ta un expresion di creatividad sin limite cu ta transforma murayanan di San Nicolas den un galeria bibo cu ta conta historia, transmit emocion y tambe ta stimula e orguyo di un comunidad.

